

DE ANTICHRISTO LIBER UNUS.

Antichristi mores. Antichristi jam multi. Antichristi origo. Ubi nasciturus, ubi et a quibus educandus sit. Illius nequitiae initia. Prædicatio. Signa. Non erunt vera. Persecutio tribus modis. Persecutionis duratio. Francorum rex ultimus Christianus. Antichristi improbitas. Antichristi finis. De Antichristo scire volentes, primo notabitis quare sic vocatus sit: ideo scilicet, quia Christo in cunctis contrarius erit, et Christo contraria faciet. Christus venit humilis: ille veniet superbus. Christus venit humiles erigere¹, peccatores justificare: ille contra humiles dejiciet, peccatores magnificabit, impios exaltabit, semperque vitia quæ sunt contraria virtutibus docebit, legem evangelicam dissipabit, dæmonum culturam in mundo revocabit², gloriam vanam quærens omnipotentem Deum se nominabit³. Hic itaque Antichristus multos habet suæ infidelitatis ministros⁴ ex quibus multi in mundo jam præcesserunt, qualis fuit Antiochus, Nero, Domitianus: nunc quoque nostro tempore antichristos multos esse novimus. Quicumque enim sive laicus, sive canonicus, sive monachus contra justitiam vivit, et ordinis sui regulam impugnat⁵, et quod bonum est blasphematur, antichristus est, et minister satanæ.

Sed jam de exordio Antichristi videamus. Non autem quod dico, ex proprio sensu fingo, vel excogito; in libris authenticis⁶ diligenter relegendo hæc omnia scripta invenio. Sicut ergo auctores nostri dicunt, antichristus ex populo Judæorum nascetur de tribu Dan, secundum prophetam⁷ dicentem: *Fiat Dan coluber in via, cerastes in semita* (Gen. XLIX, 17). Sicut enim serpens in via sedebit, et in semita erit, ut eos qui per semitam justitiæ ambulant⁸ feriat, et veneno suæ malitiæ occidat. Nascetur autem ex copulatione patris et matris, sicut alii homines, non, ut aliqui dicunt⁹, ex sola virgine: sed tamen totus in peccato concipietur, in peccato generabitur, et in peccato nascetur. In ipso vero conceptionis ejus initio¹⁰ diabolus simul introibit¹¹ in uterum matris ejus, et ex virtute diaboli confovebitur et contutabitur in ventre matris, et virtus diaboli semper cum illo erit. Et sicut in matrem Domini nostri Spiritus sanctus venit, et eam virtute sua obumbravit, et divinitate replevit, ut de sancto Spiritu conciperet, et quod nasceretur divinum esset et sanctum: ita quoque diabolus in matrem Antichristi descendet, et totam eam replebit, totam circumdabit, totam tenebit, et totam interius exteriusque possidebit; ut diabolo per hominem cooperante concipiat, et quod natum fuerit, totum sit iniquum¹², totum perditum. Unde et ille homo, *filius perditionis* appellatur (II Thess. II, 5); quia in quantum poterit, genus humanum perdet, et ipse in novissimo perdetur.

Ecce audistis qualiter nascatur: audite jam locum ubi nasci debeat. Nam sicut Dominus ac Redemptor noster Bethlehem sibi providit, ubi pro nobis humanitatem assumeret et nasci dignaretur: sic diabolus illi homini perditio, qui Antichristus dicitur, locum novit aptum, unde radix omnium malorum oriri debeat, scilicet civitatem Babyloniam. In hac enim civitate,

¹ Abest, erigere, a Ms. Regio.

² Alias, renovabit.

³ Ms. Regius, gloriam propriam quæret, Omnipotentem se nominabit. Adsonis exemplar, gloriam propriam quærens, et omisso, Deum.

⁴ Adsonis exemplar, multos habet suæ malignitatis ministros.

⁵ Legitur alias, ordinis sui gloriam impugnat.

⁶ Adsonis exemplar non habet, authenticis. In eodem codice mox exstat, de tribu scilicet Dan.

⁷ Ms. Regius, prophetiam.

⁸ Idem Ms., ambulaverint.

⁹ Ibid., ut quidam fabulantur.

¹⁰ Ms. Regius, generationis suæ primordio.

¹¹ In eodem Ms. hic inseritur locus Gregorii, ex lib. 52 Moral., cap. 12.

¹² Hic additur in Adsonis Ms., totum malum.

quæ quondam incluta et gloriosa urbs Gentilium¹ et caput regni Persarum erat, Antichristus nascetur: et in civitatibus Bethsaida et Corozaim nutriri et conversari dicitur. Quibus civitatibus Dominus in Evangelio imprecatur², dicens: *Væ tibi Bethsaida! væ tibi Corozaim* (Luc. x, 45)! Habebit autem Antichristus magos, maleficos, divinos, incantatores, qui cum diabolo inspirante nutrient, et docebunt, et imbuent omni iniquitate, et falsitate, et nefaria arte: et maligni spiritus erunt duces ejus, et socii semper, et comites indivisi.

Deinde Jerosolymam veniens, omnes christianos quos ad se non poterit convertere, per varia tormenta jugulabit, et suam sedem in templo sancto ponet. Templum etiam destructum; quod Salomon Deo paravit, tunc ædificabit, in statu suo restaurabit, et circumcidet se³, et filium Dei omnipotentis se esse mentietur. Reges autem et principes⁴ primum ad se convertet; deinde, per illos, cæteros populos. Loca vero per quæ Christus Dominus ambulavit, prius destructa; deinde per universum mundum nuntios et prædicatores suos mittet. Prædicatio autem ejus et potestas tenebit a mari usque ad mare, ab Oriente usque ad Occidentem, ab Aquilone usque ad Septentrionem. Faciet quoque signa multa, magna, mirabilia et inaudita: arbores scilicet subito florere et arescere, mare turbari et subito tranquillari, naturas in diversas figuras mutari, agitari aera ventis et multimodis commotionibus⁵, et cætera innumerabilia et stupenda, mortuos scilicet in conspectu hominum suscitari, ita ut in errorem inducantur, si fieri potest, etiam electi (Math. xxiv, 24). (a) Nam quando tanta ac talia signa viderint, etiam illi qui perfecti et electi Dei sunt, dubitabunt utrum ipse sit Christus qui in fine mundi venturus est secundum Scripturas, an non. Hæc autem omnia miracula omnibus modis falsa erunt per incantationes diabolicas, sed peccatoribus et incredulis videbuntur esse vera⁶.

Excitabit vero persecutionem sub omni cælo super Christianos et omnes electos. Eriget itaque se contra fideles tribus modis; hoc est, terrore, muneribus, et miraculis. Dabit credentibus in se abundantiam auri et argenti⁷. Quos vero non poterit decipere muneribus, superabit terrore: et quos terrore non poterit vincere, signis et miraculis tentabit seducere. Quos autem nec signis poterit illudere, in conspectu omnium miserabili morte tentabit necare. Tunc erit tribulatio, qualis non fuit ex tempore quo gentes cœperunt, usque ad tempus illud. Tunc qui in agro sunt, fugiant in montibus; et qui supra tectum, non descendant in domum, ut tollant aliquid ex ea (Ibid., 17). Tunc omnis christianus qui inventus fuerit, aut Deum negabit, aut sive per ferrum, sive per ignem fornacis, sive per serpentes, sive per bestias, sive per aliud quodlibet genus tormenti interire jubebit, si in fide permanserit. Hæc autem tam terribilis, et timenda tribulatio, tribus annis manebit in toto et dimidium⁸.

¹ Hoc, urbs Gentilium, non habet Ms. Reg.

² Alias, imprecatur.

³ In B. omissum erat, et circumcidet se. M.

⁴ Ms. Regius hic addit, et præsides.

⁵ Adsonis Ms. faciet quoque signa multa, miracula magna et inaudita; faciet ignem mirabiliter de cælo venire, arbores subito florere..... naturas in diversis figuris mutari, aquæ cursus et ordinem converti, aera ventis et multimodis commotionibus agitari. Et mox, mortuos etiam in conspectu hominum.

⁶ Adsonis Ms. non habet: Hæc autem omnia.... videbuntur esse vera.

⁷ Ms. Regius addit, tempore enim suo census et thesauri absconditi revelabuntur.

⁸ Apud Rabanum additur, manebit in toto mundo et dimidium. Ms. Regius omittit etiam, in toto. Adsonis Ms., manebit in toto mundo et dimidio.

(a) Pauca hic ommissa repetere ex Alcuino.

Tunc breviabuntur dies illi propter electos : nam nisi Dominus breviasset dies, non fieret salva omnis caro.

Tempus quidem quando Antichristus veniat, vel quando dies iudicii apparere incipiat, Paulus in Epistola ad Thessalonicenses dicens ¹, *Rogamus vos per adventum Domini nostri Jesu Christi*, manifestat eo loco ubi ait : *Quoniam nisi venerit discessio primum, et revelatus fuerit homo peccati, filius perditionis* (II Thess. II, 1, 3), etc. Scimus enim quoniam post regnum Græcorum, sive etiam post regnum Persarum, ex quibus unumquodque suo tempore magna gloria vixit, et maxima potentia floruit, ad ultimum quoque post cætera regna regnum Romanorum cœpit ², quod fortissimum omnium regnorum superiorum fuit, et omnia regna terrarum sub dominatione sua habuit, omnesque populorum nationes Romanis subjacuerunt, et eis sub tributo servierunt. Inde ergo dicit apostolus Paulus, Antichristum non antea in mundum esse venturum, nisi venerit primum discessio; hoc est, nisi discesserint omnia regna a Romano imperio, cui prius subdita erant. Hoc autem tempus nondum advenit; quia licet videamus Romanum imperium ex maxima parte jam destructum, tamen quamdiu reges Francorum duraverint, qui Romanum imperium tenere debent, Romani dignitas ex toto non peribit; quia in regibus suis stabit. Quidam vero doctores nostri dicunt, quod unus ex regibus Francorum Romanum imperium ex integro tenebit, qui in novissimo tempore erit, et ipse erit maximus, et omnium regum ultimus: qui postquam regnum suum feliciter gubernaverit, ad ultimum Jerosolymam veniet, et in monte Oliveti sceptrum et coronam suam deponet (hic erit finis et consummatio Romanorum Christianorumque imperii): statimque, secundum sententiam prædictam apostoli Pauli, Antichristum dicunt adfuturum.

Et tunc quidem revelabitur homo peccati, Antichristus videlicet; qui licet sit homo, fons tamen erit omnium peccatorum: et filius perditionis, hoc est, filius diaboli ³; quia per omnia adimplebit voluntatem suam, quia plenitudo diabolicæ potestatis et totius mali ingenii corporaliter habitabit in illo, in quo erunt omnes thesauri malitiæ et iniquitatis absconditi: qui adversatur, id est, contrarius est Christo omnibusque membris ejus: et extollitur, id est, in superbiam erigitur: super omne quod dicitur Deus (II Thess. II, 4), id est, (a) super omnes deos Gentilium, Apollinem, Jovem, Mercurium, quos Pagani deos existimant. Super omnes istos deos extollitur Antichristus ⁴, quia majorem et fortiolem se faciet illis omnibus. Et non solum supra illos, sed etiam supra omne quod colitur, id est, supra sanctam Trinitatem, quæ sola colenda et adoranda est ab omni creatura, ita se extollet, ut in templo sedeat, ostendens se tanquam sit Deus. Nam, sicut supra diximus, in civitate Babylonis natus, Jerosolymam veniens circumcidet se, dicens Judæis: Ego sum Christus vobis repromissus, qui ad salutem vestram veni, ut qui dispersi estis congregem et defendam. Tunc confluent ad eum omnes Judæi: existimantes Deum suscipere, sed suscipient diabolium.

Sive etiam in templo Dei sedebit Antichristus, id est in sancta Ecclesia, omnes Christianos cupiens facere martyres ⁵: et elevabitur et magnificabitur:

¹ Mss., demonstrat dicens, Nisi venerit, etc.

² In Ms. Regio, incipiet; et mox, erit... habebit... subiacent...

³ Addit Ms. Regius, non per naturam, sed per imitationem. Cum Regio Ms. consentit Adsonis codex qui mox habet, adimplebit diaboli voluntatem, quia plenitudo diabolicæ potestatis et totius maligni corporaliter habitabit in illo.

⁴ Adsonis Ms., super omnes deos Gentium, Herculem videlicet, Apollinem, Jovem, Mercurium, quos Pagani deos esse aestimabant, super omnes istos deos extollebit Antichristus.

⁵ Adsonis Ms., omnes Christianos faciens martyres.

(a) Aliam repete ex Alcuino explicationem.

quia in ipso erit caput omnium malorum diabolus, qui est rex super omnes filios superbiæ. Subito autem et improvise Antichristus veniet, et totum simul humanum genus suo errore decipiet et perdet. ¹

Ante ejus exortum duo prophetæ mittentur in mundum, Enoch scilicet et Elias, qui contra impium Antichristum ² fideles Dei divinis armis præmunit; et instruent eos, et confortabunt et præparabunt electos ad bellum, docentes et prædicantes tribus annis et dimidium. Filios autem Israel, quicumque eo tempore fuerint inventi, hi duo maximi prophetæ et doctores ad fidei gratiam convertent, et a pressura tanti turbinis in parte electorum insuperabiles reddent ³. Tunc implebitur quod Scriptura dicit: *Si fuerit numerus filiorum Israel quasi arena maris, reliquæ salvæ fient* ⁴ (Rom. IX, 27). Postquam autem per tres annos et dimidium prædicaverint, mox incipient excandescere Antichristi persecutiones, et contra eos primum Antichristus sua arma arripiet, eosque interficiet, sicut in Apocalypsi dicitur: *Et cum finierint, inquit, testimonium suum, bestia descendet de abyssu, et faciet adversus eos bellum, et interficiet illos* ⁵ (Apoc. XI, 7). Postquam ergo isti duo interfecti fuerint, inde cæteros fideles persequens, aut martyres gloriosos faciet, aut apostatas reddet. Et quicumque in eum crediderint, signum characteris ejus in fronte accipient.

Sed quia de principio ejus diximus, quem finem habebit dicamus. Hic itaque Antichristus diaboli filius, totius malitiæ artifex pessimus, cum per tres annos et dimidium, sicut prædictum est, magna persecutione totum mundum vexaverit, et omnem populum Dei variis pœnis cruciaverit, postquam Eliam et Enoch interfecerit, et cæteros in fide permanentes martyrio coronaverit; ad ultimum veniet ira Dei super illum, sicut beatus Paulus scripsit, dicens ⁶: *Quem Dominus Jesus Christus interficiet spiritu oris sui* (II Thess. II, 8); (a) sive Dominus Jesus potentia suæ visionis illum, sive archangelus Michael per virtutem Domini nostri Jesu Christi occidet ⁷, non per virtutem cujuslibet angeli vel archangeli. Tradunt autem doctores, quod in monte Oliveti occidetur Antichristus, unde Dominus ascendit ad cœlos ⁸. Debetis autem scire quia postquam fuerit Antichristus occisus, non statim erit dies iudicii, nec statim veniet Dominus ad iudicium; sed exspectabit Dominus quosdam, sicut ex libro Danielis intelleximus, qui seducti sunt, ut ad pœnitentiam revertantur. Postquam vero pœnitentiam expleverint ⁹; quantum temporis sit quousque Dominus veniat, nemo est qui sciat, sed in dispositione Dei manet; quia ea hora sæculum iudicabit, qua ante sæcula iudicandum esse præfixit.

¹ Al. Rabanus: *Sed ne subito et improvise Antichristus veniat, et totum simul humanum genus suo errore decipiat et perdat; ante ejus exortum, etc.* Consentit cum Rabano Adsonis codex, nisi quod habet, ante ejus exordium.

² Mss., contra impetum Antichristi ita codex Adsonis, qui paulo post habet, tribus annis et dimidio.

³ Hæc a verbo, docentes, usque ad verbum, reddent, absunt a Ms. Reg. et Alcuino.

⁴ Adsonis Ms., reliqui salvi fient; et paulo post, mox incipiet excandescere Antichristi persecutio.

⁵ Adsonis Ms., bestia quæ ascendet de abyssu, faciet adversus eos bellum, et vincet eos et occidet illos.

⁶ Adsonis Ms. veniet iudicium Dei super eum, sicut beatus Paulus apostolus scribit; dicens.

⁷ Adsonis Ms.: Sive Dominus Jesus interfecerit illum potentia virtutis suæ, sive archangelus Michael interfecerit illum; per virtutem Domini nostri Jesu Christi occidetur, non per, etc.

⁸ Adsonis Ms., occidetur in papilione et in folio suo, in illo loco contra quem ascendit Dominus ad cœlum.

⁹ Adsonis Ms., sed sicut in libro Danielis intelligimus, quadraginta dies Dominus concedet electis ut agant pœnitentiam propterea quod seducti sunt ab Antichristo. Postea vero quam hanc pœnitentiam expleverint.

(a) Quæ sequuntur, ex Rabano supplemus.